

Powšitkowne WOZJEWJENJA

njedźelu, 10. awgusta 2025

Na Marije donjebjeswzaća kemše w Róžeńće

Serbskorěčna Boža mša na swjedženju swjateje Marije do njebjeswzaća pjatk, 15. awgusta, w Róžeńće budže w 9.00 hodź. Wšitcy wěriwi su wutrobnje přeprošeni.

Boža mša a modlenje w Róžeńće

Na Božu mšu a modlenje před Najswjećišim su wěriwi pjatk, 15. awgusta, we 18.00 hodź. do Róžeńčanskeje hnadowneje cyrkwy přeprošeni. Tón dzeń so zdobom Gig-festiwal na samsnym městnje zahaji.

Zelowa njedźela a swójbny swjedzeń

Křesćansko-socialny kubłanski skutk z.t. přeprošuje zhromadnje z klóštrom Marijinej hwězdu na zelowu njedźelu do Zežiwijskeho a zeloweho centruma w Pančicach-Kukowje, kotraž budže 17. awgusta. Zdobom budže to lětsa klóšterski a swójbny swjedzeń. Swjedženske kemše w 10.30 hodź. budže Zhorjelski generalny wikar Markus Kurzweil swjećić. Zakónčacy ekumeniski nyšpor ze žohnowanjom zelow, kotryž swjeći mjez druhim fararka Jadwiga Malinkowa ze Slepoho, budže w 17.00 hodź.

Wustajeńca wo stawiznach nabožneho a narodneho lajskeho dźiwadła wosady

„Serbske nabožne a narodne lajske dźiwadło w Chróšćanskej wosadze wot lěta 1877“ rěka nowa wobrazowa wustajeńca, kotruž je sekcija wěda a skutk Towarstwa Cyrila a Metoda z.t. zestajiła. Wurězk z njeje – dźesać taflow – budže we wobłuku zeloweje njedźele Zežiwijskeho a zeloweho centruma w Pančicach-Kukowje njedźelu, 17. awgusta, w tamnišej lodowej pincy přistupny. Cyłkownu přehladku móža sej zajimcy kaž tež hosćo kongresa Europasion w septembrje w Chrósćicach wobhladać.

Zetkanje samostejacych

Samostejacy ze serbskich wosadow su na dalše zetkanje wutoru, 2. septembra, w 14.00 hodź. do Smochčanskeho kubłanišća swjateho Bena přeprošeni. Zajimcy njech so hač do wutory, 26. awgusta, w redakciji Katolskeho Posoła přizjewja, telefonowe čisło (0 35 91) 55 02 12. Dalši zajimcy, kotřiž njesu samostejacy, su tohorunja wutrobnje witani. Kóždy njech sej Wosadnik sobu přinjese. Štóž chce wotewzaty być, njech to prošu zdźeli.

Ministrantska kopańca

Koparski turněr ministrantow ze serbskich wosadow budže sobotu, 30. awgusta, w Pěskecach. Započatk je w 9.00 hodź. z Božej mšu we wjesnej kapałce. Přizjewjenja přijimuje Worklečanske dekanatne dušepastyrstwo hač do pjatka, 15. awgusta, z mejlku na adresu dekanatsjugend-sorben@bddmei.de.

Dworowy swjedzeń w Hrubjelčicach

Serbske ewangelske towarstwo a Maćijec swójba přeprošujetej wšitkich Serbow a dalších zajimcow na lětnje pućowanje a serbski swjedzeń sobotu, 16. awgusta. Započatk je w 14.00 hodź. na Jaworkec/Maćijec dworje w Hrubjelčicach, Čěchorčanska 16. Wottam podadža so wobdźělnicy na pućowanje k pomnikej Marije Simonoweje w Dobruši a dale na hrodzišćo wsy. Po swačinje na dworje přizamknjetej so tam w 17.00 hodź. serbska ekumeniska nutrnosť z dekanom Witom Šćapanom a Serbskim superintendentom Krystofom Rummelom kaž tež program ze skupinu Fünf an der Feier. W bróžni budže bifej z jědźemi přihotowany. Přeprošeni su tež wšitcy, kotřiž chcedža hakle na nutrnosť abo program přińć. Při sylnym dešču započnje so swjedzeń w 17.00 hodź. w Maćijec bróžni.

Zastupne lisćiki za pasionske předstajenje online hižo kupić

Za inscenaciju pasionskeje hry „Sćěhuj mje!“ lětsa w septembru w Chrósćicach móža sej zajimcy zastupne lisćiki online kupić. W padže, zo by zarjadowar jednotliwe předstajenje wotprajić dyrbjał, wón pjenjezy kupcam wróći. Link na přistup je pod www.posol.de a tam pod wotkazom na pasionsku hru wozjewjeny. Tam su tež plaćizny podate. Na plakatach a flajerach nańdu zajimcy – kaž tule – QR-code na wotpowědnu stronu. Tež při kasy móža sej zajimcy lisćik kupić. Towarstwo Cyrila a Metoda z.t. (TCM) předstaji pasionsku hru zhromadnje z Chróšćanskej wosadu pjatk a sobotu, 5. a 6. septembra, w 19.30 hodź., njedźelu, 7. septembra, w 16.00 hodź., kaž tež sobotu a njedźelu, 13. a 14. septembra, w 19.30 hodź. w Chrósćicach na farskej lúce.

Dekanatny dzeń w Róžeńće

Wšitcy wěriwi su sobotu, 23. awgusta, na zhromadny dzeń Budyskeho dekanata pod hesłom „Marija – znamjo nadźije“ do Róžanta přeprošeni. Liturgiske zahajenje budže w 15.00 hodź. z wustajenjom Najswjećišeho w putniskej cyrkwi. Hižo wot 14.00 hodź. poskićuja wosady kofej, jeli to same organizuja, dokelž so zahe na puć podadža. Štóž chce, móže piknikować. Wot 16.00 do 18.00 hodź. změja zamołwići pisanu zabawu wokoło cyrkwe spřihotowany, mjez druhim wšelake hry, paslenje, hermanke a džěćacy program. W cyrkwi móža wopytować na hudźbu sluchać. Nimo toho budže tam přiležnosť, sakrament wujednanja w swjatej spowědži přijimać, abo spowědnu rozmołwu wjesć. Dekanatny dzeń skónči so z Božej mšu we 18.00 hodź. w Róžeńčanskej swjatnicy. Tón dzeń předwječorne kemše w serbskich wosadach njebudu.

Gig-festiwal w Róžeńće

Lětuši Gig-festiwal je wot pjatka do njedźele, 15. do 17. awgusta, w Róžeńće planowany. Program kaž tež přehlad wobdźělnikow stej na internetowej stronje festiwala wozjewjenej. Link na nju je pod www.posol.de podaty.

Žarowanski kruh Carity – jedyn za džěći, druhi za dorosćenych

Hospicna služba Hornjołužiskeho zwjazka Carity z.t. přeproša na žarowanskej kruhaj, kotrež zahajitej so štwórtk, 18. septembra. Jedyn je za džěći, druhi paralelnje za dorosćenych mysleny. Wobaj trajetej stajnje wot 16.00 do 18.00 hodź. Přenje zetkanje budže w rumnosćach zwjazka Carity w Kamjencu na Zapadneje 22. Zajimcy měli so za kurs, kotryž přewjedže so z džesać zetkanjemi něhdže do srjědź lěta 2026, do toho telefonisce pod čisłom (0 35 78) 37 43 12 abo z mailku pod adresu Hospiz@Caritas-Oberlausitz.de přizjewić.

Młodostni na dwudnjowsku kublansku jězbu přeprošeni

Serbskich młodostnych přeprošuje Towarstwo Cyrila a Metoda z.t. (TCM) na jězbu do Dachauwa a Mnichowa. Při tym póndže mjez druhim wo přesčěhanje Serbow za čas nacionalsocializma, wosebje na přikładze zbóžneho kapłana Alojsa Andrickeho. Bus wotjědže pjatk, 3. oktobra, w 6.00 hodź. Nawróť je za sobotu, 4. oktobra, wokoło 20.00 hodź. planowany. Předwidžane je přeni dzeń popołdnu wodženje po Dachauskim wopomnišću koncentraciskeho lěhwa, hdžež su wjacori serbscy duchowni zajeći byli. Na pózdnim popołdnu je w klóštrje karmelitkow na teritoriju wopomnišća Boža mša skazana. Nazajtra wopytaja wobdžělnicy jězby w Mnichowje pomnik za wopory nacionalsocializma. Wo dalšu wosebitostku so TCM hišće stara. Na zažnym popołdnu so na dompuć nastaja. Jězba z přenocowanjom a zastaranjom płáči 50,00 eurow. Přihotowanske zetkanje budže sobotu, 27. septembra, w 14.00 hodź. w Radworju na farje. Na jězbu přeprošeni su wšitcy zajimowani młodostni, wosebje či, kotřiž budu lětsa do wosadneje młodžiny přiwzaći. Za to měli so woni online přizjewić. Link je pod www.posol.de wozjewjeny.

Džěłarnička ikonografije „wobraz a słowo“ za młodostnych

Młodostni, maće lóšt na workshop, wulět a wuměnu z pólskimi młodostnymi? To wšitko móžeće wot pjatka do soboty, 19. do 20. septembra, w „Domje Gerharta Hauptmanna“ w Jelenjej Górze dožiwić. Čehodla džěłarnička ikonografije? Pisanje ikonow słuša k rědkim wuměłstwam. Ikona je uniwersum, wobstajacy z mnohich tradicijow a technikow, kotrež buchu wot generacije ke generaciji na wšelakich městnach a we wšelakich nabožinach dale dawane a hač do džensnišeho posrědkowane. Tuž budźće wotewrjeni a wćipni za nowe impulsy a kulturnu wuměnu mjez młodostnymi. Při přizjewjenju pod sekretariat@sorbisches-museum.de maće mjeno, adresu, starobu a swoje telefonowe čisło podać. Interreg Pólska-Sakska a Euroregion Nysa projekt spěchujetej. Tohodla směće so jako młodostni darmotnje wobdžělić. Wjace informacijow nańdžeće na stronje Serbskeho muzeja www.sorbisches-museum.de. *M. Ošikowa*

Relikwiar swjateje Terezy z Lisieuxa w Budyšinje

Składnostnje lětušeje 100. róčnicy swjatoprajenja swjateje Terezy z Lisieuxa (1873–1897) budže relikwiar, pućowacy po cyłej Němskej, z někotrymi jeje smjertnymi powostankami wot srjedy do pjatka, 17. do 19. septembra, w Drježdžansko-Mišnjanskim biskopstwje. Wšitcy wěriwi su přeprošeni relikwije česćować, na přikład sami čicho, abo so k modlenju a Božim službam zhromadzić. Přenja planowana stacija je Budyska cyrkej Našeje lubeje Knjenje, dalša budže cyrkej swjateho Antonija w Drježdžanach-Löbtauwje a jako poslednja wosada swjateje Terezy w Flöha. W Budyšinje budže srjedu, 17. septembra, we 18.00 hodź. mjez druhim nyšpor za wšitkich serbskich wěriwych z duchownymi impulsami a wujasnjenjemi. Nazajtra, štwórtk, 18. septembra, w 9.00 hodź. swjeća Božu mšu w cyrkwi Našeje lubeje Knjenje za wšěch wěriwych. Na česćowanje su wuraznje tež wěriwi z druhich wosadow přeprošeni.

Počesća třoch Zejičanow

Zejičanska wjesna zhromadnosć, Maćica Serbska z.t. a Towarstwo Cyrila a Metoda z.t. přeprošuja wšitkich na poswjećenje pomnika za prelata a čestneho kanonika Jakuba Buka, kanonika Michała Buka a kanonika Jakuba Šubu. Wšitcy tři su rodzeni Zejičenjo. Chróšćanski farar Měrćin Deleńk poswjeći pomnik, kotryž změje swoje město při wjesnym swjatym křižu, njedźelu, 24. awgusta, w 15.00 hodź. Farar Beno Jakubaš wosobiny předstaji. Cyrkwinski chór a dujerjo Chróšćanskeje wosady swjatočnosť wobrubja. Po nej su wšitcy na swačinu přeprošeni. Awta smědža na parkowanišću při křižowanišću wotstajić.